



Број: 01,02,03,04/5-05-2-669/25

Сарајево, 16. 6. 2025.

БОСНА И ХЕРЦЕГОВИНА
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ
САРАЈЕВО

ПРЕМЛЈЕНО: 25-06-2025			
Организациона јединица	Класификациона ознака	Редни број	Број прилога

IZVJEŠTAJ

sa seminara Posebne grupe za Mediteran i Bliski istok PSNATO-a,
Antaliја, Republika Turska, od 28. do 30. aprila 2025.

Predsjedavajući Delegacije Parlamentarne skupštine Bosne i Hercegovine u Parlamentarnoj skupštini NATO-a (PSNATO) Kemal Ademović i zamjenik predsjedavajućeg Delegacije Obren Petrović učestvovali su na seminaru Posebne grupe PSNATO-a za Mediteran i Bliski istok, koji je održan od 28. do 30. aprila u Antaliји, Republika Turska.

Seminar, organiziran u saradnji s Delegacijom Republike Turske u Parlamentarnoj skupštini NATO-a i Velikom narodnom skupštinom Republike Turske, okupio je oko 90 parlamentaraca iz 32 zemlje, od kojih je 18 članica NATO-a, te predstavnike iz 15 partnerskih delegacija, uključujući osam delegacija iz zemalja Bliskog istoka i Afrike. Osim parlamentaraca, u radu seminara učestvovali su i brojni visoki zvaničnici, predstavnici međunarodnih i nevladinih organizacija, akademske zajednice, istraživačkih centara, kao i eksperti iz relevantnih oblasti, a u fokusu diskusija bile su aktuelne geopolitičke prilike i sigurnosni izazovi u regionu Mediterana i Bliskog istoka, uključujući širi prostor MENA regije. Učesnici su razgovarali o novoj strateškoj slici Bliskog istoka, ulozi Irana u regionalnim sukobima, kao i o kinesko-ruskom strateškom angažmanu na Bliskom istoku i u Africi. Također, bilo je riječi i o rastućoj ulozi zemalja Zaljeva u globalnom poretku, pomorskoj sigurnosti i osiguranju strateških plovnih puteva, kao i o zajedničkim sigurnosnim izazovima u euromediterranskoj regiji – uključujući energetska sigurnost i migracije. Diskutirano je i o ulozi Rusije unutar MENA regije, posljedicama rata u Ukrajini, odnosima zemalja spomenute regije s NATO-m, izazovima migracija, klimatskih promjena i sigurnosti hrane.

Na svečanom otvaranju seminara prisutnima su se obratili predsjedavajući Delegacije Republike Turske u PSNATO-u i domaćin seminara Mevlüt Çavuşoğlu, predsjedavajući Posebne grupe PSNATO-a za Mediteran i Bliski istok Fernando Gutierrez (Španija) te potpredsjednica PSNATO-a Ágnes Vadaí (Mađarska), koja je u svom obraćanju posebno istakla važnost dijaloga i izgradnje povjerenja među partnerima s ciljem očuvanja međunarodnog poretka zasnovanog na pravilima.

Prvog dana seminara raspravljalo se o sve izraženijoj ulozi zemalja Zaliva u globalnim sigurnosnim i političkim procesima, kao i o jačanju partnerstava NATO-a u ovom strateški važnom području. U diskusijama je posebna pažnja posvećena neujednačenom ekonomskom razvoju i

sigurnosnim kapacitetima unutar zemalja Zaliva i njihovih susjeda, te načinu na koji te razlike oblikuju regionalnu stabilnost i odnose sa Zapadom. Istaknuta je i saradnja zemalja Zaliva sa Sjedinjenim Američkim Državama, kao i mogućnosti za proširenje političkog dijaloga i institucionalnog jačanja kroz inicijative NATO-a.

Giovanni Romani, šef Odjela NATO-a za Bliski istok i Sjevernu Afriku, u svom izlaganju naglasio je potrebu za jačanjem političkog dijaloga NATO-a sa zemljama Zaliva, podršku izgradnji institucionalnih kapaciteta i širenju prisustva Saveza u regionu, te unapređenju saradnje s regionalnim i međunarodnim organizacijama.

U drugom dijelu dana razmatrani su i strateški izazovi povezani sa situacijom u Siriji, promjenama ravnoteže moći na Bliskom istoku, te sigurnosnim prijetnjama koje proizlaze iz uloge Irana u podršci različitim proxy grupama. Poseban segment diskusije bio je posvećen preliminarnom nacrtu izvještaja Posebne grupe za Mediteran i Bliski istok o temi: *Prijetnja Irana regionalnoj i euroatlantskoj sigurnosti*.

Drugog dana seminara pažnja je bila usmjerena na savremene sigurnosne izazove, uključujući terorističke prijetnje i odgovor NATO-a u borbi protiv terorizma, kao i na pomorsku sigurnost i važnost očuvanja slobode navigacije kroz strateške prolaze poput Crvenog mora, naročito u kontekstu rastuće upotrebe hibridnih prijetnji i disruptivnih tehnologija.

Također su analizirani kineski i ruski strateški angažmani na prostoru Bliskog istoka i Afrike, s fokusom na posljedice njihovog širenja uticaja po regionalnu i globalnu stabilnost. Učesnici su posebno razmotrili i rastuću nestabilnost u Sahelu, kao regiji čije sigurnosne i migracijske implikacije sve više utiču i na euroatlantski prostor.

U okviru programa seminara, članovi Delegacije PSBiH razgovarali su i s potpredsjednicom PSNATO-a Ágnes Vadai, koja je nedavno boravila u zvaničnoj posjeti Sarajevu kao članica Delegacije Parlamentarne skupštine NATO-a. Vadai je ovom prilikom ponovo izrazila zahvalnost za iskazano gostoprimstvo i visok nivo organizacije tokom njene posjete Bosni i Hercegovini, ocijenivši je kao veoma korisnu i informativnu. Također je ponovila snažnu podršku evropskom i euroatlantskom putu Bosne i Hercegovine, istakavši prijateljske odnose s bh. institucijama.

Na marginama seminara, predsjedavajući Delegacije Kemal Ademović i zamjenik predsjedavajućeg Delegacije Obren Petrović održali su bilateralni sastanak s članovima Delegacije Velike narodne skupštine Republike Turske u PSNATO-a. Sastanku su, pored predsjedavajućeg Delegacije Turske Mevlüta Çavuşoğlua, prisustvovali i članovi Delegacije Fatma Aksal i Mustafa Kaya.

Predsjedavajući Delegacije Turske u PSNATO-a Mevlüt Çavuşoğlu poželio je dobrodošlicu našoj delegaciji, istaknuvši da Turska ulaže značajne napore za sigurnost i mir u Bosni i Hercegovini i na Zapadnom Balkanu. Naglasio je da Turska vodi pozitivan dijalog sa svim predstavnicima vlasti u BiH, te da aktivno radi na tome da se naša zemlja razvija i napreduje. Članovi Delegacije Turske naglasili su da su mir i sigurnost u regionu od ključne


važnosti te izrazili potrebu za kontinuiranom podrškom međunarodne zajednice kako bi se osigurala stabilnost i prosperitet Bosne i Hercegovine.

Članovi Delegacije PSBiH u PSNATO-a uputili su izraze duboke zahvalnosti domaćinima na izuzetno uspješnoj organizaciji seminara, besprijekornom gostoprimstvu i dosljednoj podršci koju Republika Turska kontinuirano pruža Bosni i Hercegovini za očuvanje suvereniteta, teritorijalnog integriteta i međunarodnog subjektiviteta BiH. Istovremeno su istakli da Republiku Tursku prepoznaju kao prijatelja i pouzdanog saveznika. Posebno su naglasili da je Turska postigla izvanredne rezultate razvojem turističkog sektora i istakla se u međunarodnoj diplomatiji. U tom duhu zamolili su da Turska i dalje nastavi pružati podršku u diplomatskoj ofanzivi Bosne i Hercegovine prema NATO-u i Evropskoj uniji.

Završni dan seminara obilježen je zaključnim obraćanjem Mevlüta Çavuşoğlua, domaćina i predsjedavajućeg Delegacije Republike Turske u PSNATO-a, koji se zahvalio svim učesnicima i istakao važnost političkog dijaloga, jačanja strateškog partnerstva i međunarodne saradnje s ciljem očuvanja mira i stabilnosti u regionu Mediterana, Bliskog istoka i šire.

Izvještaj odobrili:

Predsjedavajući
Delegacije PSBiH u PSNATO-a



Kemal Ademović


Drugi zamjenik predsjedavajućeg
Delegacije PSBiH u PSNATO-a



Obren Petrović

Izvještaj pripremio:

Sekretar Delegacije
PSBiH u PSNATO-a



Josip Zovko

Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- članovima Delegacije PSBiH u PSNATO-a
- a/a